

Kerwesprouch vun Kinsteere



1986



Ich begrieß eich herzlich, liewe Leit,
uff unserm Kerweumzug heit.
Seit Summer nur von Kerb gebabbelt
honn mir Kerweborsch uns oaner abgezabbelt.
Voller Lust un Tatendrang
de Bauch voll Bier, im Schnabbel Gesang.
Honn mir geschmückt, gedicht, gehämmert.
Oft so in mer hoam un es hot schun gedämmert.
Doch jetzte stehe mir bereit
für unser Kinsteerer Kerwezeit.

Drum Kellner, schenk die Gläser voll Woi,
Kinsteerer Kerb soll unser soi.



Im 'Goldene Blatt', do stands zu lese:
In England is wirrer e Hochzeit gewese.
Andruu, de dritte Balg vun de Elsbeth, de Kwiin
war iwwerall als Fraueheld verschrien.
Doch dann kam Säraa, mit rotem Haar un Sommersprossen,
in die hot sich der Prinz aach prompt verschosse.
Zur Trauung ging's dann net im speckische VauWee.
Des war e goldisch Kutsch mit Ledercanapee.
Die Brite hatte uffgebote ihrn ganze Pomp un Prunk,
in de ganze Welt konnt mer's sehe live im Fernsehfunk.
Doch laßt's eich sage, liewe Leit,
net nur im Geld liegt Ehefreid.

Drum Kellner...

Lange John war Atomkraft sichere Energie,
 daß do mol was passiert,des dachte mer nie.
 Mer war sich so sicher,es war alles so schee,
 bis so en Dabbes dut am falsche Rädsche drehe.
 Des is es Problem,wenn so Sache passiern ganz aus Versehe
 un dodraus dut e Katastrop entstehe.
 Drum Vorsicht,paßt uff,daß ihr eich net verrennt,
 die Strahlung kriegt eich schneller,als ihr renne kennt.



Kutscheno by 2



Oh,Bum Bum,du strahlender Held der Nation,
 du machtest Tennis zur Volksreligion.
 Viel träume vum Geld,große Autos unn Fraun
 unn tun sich wie du die Klamotte versaun.
 Doch anstatt in Wimbelden de Sieg zu erringe,
 tun die e Lied vum hohe Beitrag im Tennis-Club singe.

Drum Kellner...



Sausfork, Denwer, Glottertal,
Intrige gibt es iwwerall.
Wenn Brinkmann mit Alexis kuschelt,
Bobby im Schwarzwald letzte Worte nuschelt.
Dann bricht des deutsche Fernsehherz:
Wie schee is annern Leit ihren Schmerz.
Doch Leit, paßt uff bei eierm Glotze,
mit was für Sache die noch uffmotze,
wie die lewe, wen mer liebt un haßt,
daß ihr eier eigen Lewe net verpaßt.

Drum Kellner...

Eisdiele


Die Terroriste, mer kann's net fasse,
honn sich aach in Risselsem niedergelasse.
In de Eisdiehl honn se Eis gefresse
un vielleicht e bisje lang gesesse.
En Passant hot se erkannt un notiert,
schon wenig später war's passiert.
Es war fast leicht, se auszuschalte,
die Polizei kam un hot se festgehalte.
Drum hert jetzt uff mit Lotto-Tippe
un uff anner Weis eier Geld förtzukuppe.
Denn mehr Geld gibt's für jeden Mann,
der Terroriste fange kann.



Drum Kellner...

Hinnenaus zur alte Opelbahn
is en Bauer uff soim Feld erumgefahrn.
Er war grad fertig mit em Zackern,
noch voller Schweiß vum viele rackern.
Un wie er stolz soin Werk bewunnert,
do dut's en Schlag, es blitzt un dunnert.
Der Schlepper, der brennt lichterloh.
Der Mann rennt hoam, wählt eins-eins-zwo.
Die Feierwehr is zwar glei gekumme,
doch der Traktor war net mehr hiezubekumme.
Un die Moral vun de Geschicht:
Provoziere deinen Schlepper nicht !

Drum Kellner...



Die Stadt is endlich zum Entschluß gekumme:
De Bismarckplatz werd in Ogriff genumme.
Der Platz, der war sehr lange Zeit,
es schtaabischt Flecksche weit un breit.
Jetzt werd er umgeännert ganz un gar,
was dodraus werd is koanem ganz klar.
De aale Bismarck guckt vum Himmel runner,
aach er hofft noch uff große Wunner.
Sogar mir Kerweborsch krieje die Locke gekirzt.
Seither hon mir unsern Boam uff de Platz umgestürzt.
Ab heit misse merm stehend die Krone absäje,
weil sunst det die sich in Wintersteins Blumebeet leje.

Drum Kellner...



Hoftorn soin,des weiß hier jedermann,
am vordre End vum Grundstück dran.
So e Dier die dut oam diene - Parke is do meist verbote -
als Schutzwall geje nächtliche Chaote.
Mit Klingel orrer Schlisselbund
kimmt mer dorsch zu jeder Stund.
Doch es geht aach anners,wie ich Eich jetz erzähle du,
do war e Fraa, die war schun morjens rabbelzu.
Sie steit dohoam ins Auto noi,
Blei in de Fiiß un de Kopp voller Woi.
Un wie se aus ihrm Hof rausfährt so alkoholumnewwelt,
hot se zuviel an de Schaltung rumgehewwelt.
Sie hippt iwver die Gass wie e Känguruh
schnurstracks uff em Nochber soin Hoftor zu.
Un wie se wirrer die Aache uffschlägt,
do hot se dem sauber soin Hoftor zerlegt.
Drum gude Fraa,aach wenn de was getrunke hast,
probier erst mol aus,ob net aach en Schlissel paßt.


Drum Kellner...





Kröver Nacktarsch, Schwofe, Walzertakt,
hat's Kinsteerer Volk gepackt.
Seit longer Zeit es erste Mal,
net nur an Kerb en volle Saal.
Die Tanzabteilung vum TV zehn Johr is jetzt alt,
do dachte se: Jetzt mache mer's halt.
En Frühlingsball mit alle Ferz un Kricke,
um dere Sach mit de Bäll emol en neie Stempel uffzudricke.
In eigener Regie hon sen uff die Boa gestellt.
Des war genau des, was de Leit gefällt.
Geschwunge um die eigene Achse,
gewedelt mit de lange Haxe.
So was macht Laune, do komme die Leit,
die komme aach moje un net nur heit.
So isses rischtisch, neue Wege misse mer gehn.
Was e Glick tun des endlich aach die Vereine verstehn.
En Gemeinschaftsball is geplant an Fassenacht.
Den Vorschlag hon mir Kerweborsch schon lange gemacht.
Dann geht's endlich uffwärts mit unserm kulturelle Lewe.
Drum kommet zuhauf - un wer net kimmt, der kann was erlewe.

Drum Kellner...



Un nun paßt emol uff, was dies Johr is passiert,
 die Eusätz vun de Feierwehr laafe sonst wie geschmiert.
 Doch im Frijohr war des net de Fall,
 da gabs bei Schick en riese Knall.
 Der oane hot gewunke, es wär alles frei,
 de Risselsemer hot gedacht, ich bin aach debei.
 Bis die des gemerkt hon, sie wärn net gemohnt,
 do hat unsern Winker schun nix Gudes geohnt.
 Er wollt's noch verhinnern, hat awwer Pech,
 im nächste Moment rabbelt's furchtbar nach Blech.
 Do kimmt mer ins Staune mit gudem Gewisse,
 hot der Kerl doch den Karrn samt Mauer umgerisse.
 Der Schade war groß, es war nix me zu mache,
 doch der der bezahle muß, dem is garnet zum lache.
 Unn die Moral vun der Geschicht:
 Traue einem Winker nicht.

Drum Kellner...

Es fuhr sehr long in unserm Ort
en Mann erum mit seum Rekord...
So hon mir Vorsjohr des Sprischje hier gebracht,
un am Kerwemontag war der Mann sehr uffgebracht.
Er wollts net glawwe, daß er selbst sogar,
aach emol in diesem Sprischje war.
Debei hot er doch aach so Sprisch geschriwwe
un debei onnern Leit uff die Palm getriewwe.
Mir sages jetzte alle Leit,
was mir hier schreibe ist net bees gemeint.
Mir wolle Eich e bissje Freid hier mache,
drum tut aach mol iwwer Eich selber lache.
En Dichter hat es einst gesacht:
Humor ist, wenn man trotzdem lacht!

Drum Kellner...



Ich mach jetzt hier an der Stell Schluß,
weil alles mol en End ho muß.
Doch unsern Tach, der is noch lange net vorbei,
heit owend geht's dann in de Saal enoi.
Do dun mir danze, lache, singe
unn eich e bisje Frohsinn bringe.
Do kreischt de Mops im Haferstroh:
KINSTEERER KERB IS WIRRER DO !!!

Drum August hach jetzt uff die Trummel
unn weiter geht's im Kerwerummel.



Die Kinsteerer Kerweborsch möchten sich bei
Herrn Walter Giesecke für die gelungene Illustration
des Kerwespruchs bedanken.